


MIYO KOOSUWELA

 Hiyo vekeekhai n'atthu ooreeriwa okhala va voosiis'ula, okhala akumi mulaponi, wona okathi mukina muulupale wa Paasikha. Paasikha kweekwe onniruuha e—etthu yoovuwexa wa hiyo, miroromelo misya. Ni—ni so wunnuwa saana!

² Nto kimalaka-ru ovolowa musaala ottuli iwe voosiis'ula, ookhala okikumananne khwira, “Munna Branham, nyuwo munnimusuwela ttu—ttutthu, wala mwanamwane, wala mutthu, aavekeleliwe oChautauqua, mwaisana, vaatthuneya okumihiwa murim'awe, ni oheliwa ivaavula vaavo.” Khwira, “Tutthu uwo aahivonihwa, ni ori mpaani mu voosiis'ula, vekeekhai, ni okilanthé va voosiis'ula.” Tivo ti yooreera, ninookhalana onamooná mwaamukhaani wa yoowo khino okathi vakhani nihinatthi opacerya muteko mukina. Nto n'atthu ootteeliwa murima tu.

³ Vano kinrowa onvekela Munna Neville vakhala wira onosoma Yoolempwa ya Matewu wala Luka, emosa, ya ohihimuwa, vakhala wira khamunatthi osoma. Moosoma, munna? [Munna Neville oniira, “Nnari.”—Mol.] Vano, niilikanyihaka wira nivekele.

⁴ Nto vano nittharaka okokhorela nno, onookhala muteko wo ovoniha. Vammal'aya mutek'ola, muroweke wolyaani wanyu wa voosiisu. Nto, numala yeeyo, ninootthika-tho iwoora thanu na xexe ni minuutu miloko miraru nipacerye muteko mukina. Vano nto miteko so ovoniha sinootthara yoowo. Vano nto miteko sa opatiiso sinootthara yoowo.

⁵ Nto okathi xeeni wooreera ory'aya wa opatiiso! Oh, wulu! Ohihimuwa! Mwaha wa yeeyo onipatisiw'ahu, okhala wira Owo oohihimuwa.

⁶ Kinnuupuwela nihinatthi okhalana nipuro nahu n'opatiiso va, kaanaakuxaka ni waaroiha omuro nno, oxaaka, voosiisu wooriirya, ni waapatisa atthu ohitto iwe omuro. Yookhala etthu ya yeeyo, tu, owo okathi wooreera. Paasikha, owo okathi muulupale.

Kaamuweha Munna Pat Tyler okilanthé va.

⁷ Miyo kaalavula ni mutthu mmosa nsana ohiyu, wira, muthukumano ahu wookiserya Oklahoma, kaahiphavela o, kinoophavela vano (ni kinoohimya ela) osusa mpakha Muluku akiitthane wira kiire, muteko aka wa khalayi wo olamula sa mmurimani, okhala wira kinoona wira (epacerele) owo ti mu—muteko musya onkela.

⁸ Ohiyu uwo, hata mutthu ahisuwelaka yeeyo, kaahehererya mwa mwaana mmosa aarwiye vaplataforma, aayariwe ohoona,

ttutthu; ni aari ohoona mara, mwammiravo mmosa oophiyaka ntoko miyaakha muloko ni mithanu na mosa. Nto naanaanoru owo khukhuwela, “Munna Branham, kinniwerya woona!” Nto vaavale, ni Pat aari...Ty...eemenle vakhiviru, vakhiviru ni mwammirav’owo, okathi maitho awe yaatthukunw’aya emaara yoopacerya mwa makhalelo awe othene. Nto siiso kinniroromela wira muri vaava, ni miwehereryo suulupale, ni yoomi, kinniwehererya etthu, Muluku oniirela, ni oniruuha mpakha mukhalelo mukina ovikana ole onkhalak’ahu.

Nuurame miru sahu vano wira nivekele.

⁹ Tith’ihu Oomoriwa ikharari a Wirimu, ntoko sithukumann’ahu voosiis’ula, va mukereja yaamukhaani okerekhere w’ephiro, hiyo vekeekhai ninnixukhuru mwaha wa Nyuwo, mwaha wa soohimya iya sothene wa hiyo, ni vanci-enexa voosiis’ula wa Paasikha. Ahaakhanle Paasikha, hiyo khinaarowa okhala enamuna ery’ahu olelo. Wira, Paasikha t’ule aatthintte ekanyeryo anatiri othene a Muluku. Owo ohaalipiherya awo wa hiyo. Sothene Owo otonko awe olaiherya, sothene sookhalihwiwa ekeekhai oPaasikhani. Nimosa wa mahiku maalupalexa ootthapela nikhany’ahu okhalanaka mwa mwaakha! Nto hiyo naamuvekela, Pwiya, olelo, wira Nyuwo mukurunuxe mirima sahu naakilaathiki, nilipelelaka, ni vathi wa miwehereryo mwaha wa Eroho Yowarya, Yeeyo jaarwiiye nuvira Paasikha, wira erwe vamurimani vahu ni enikurunuxe murima, ni yuuluule waamini wahu, mwa miphimo suulupale sa ikuru, wira niweryeke weettela makhalelo Yesu onirumaly’awe weettela.

¹⁰ Naammuvekelela khula mutthu mmosa, ni vanci-enexa ale atthukweliwe ni ehinawerya orowa mmitekoni so okokhorela hata nipuro olelo. Muluku, mukhale ni yaawo. Ni wira—wira Paasikha ola omphwanye Paasikha eekeekhai w’awo, ovenya okhuma voolilini, ni ekumi esya awo ahinatoko aya osuwela aakhalaru. Munivahe, Pwiya.

¹¹ Wira khula mulaleyi, khula murumeyi Nyuwo murin’anyu mulaponi mothene olelo, onthapela muupuxeryo ola muulupale, ekhalane muttikithelo ni ikuru ni Owerya, wira eruuhele mithukumano saya (ipwittipwitthi sinliplelela) Yolya Muluku orin’awe yosukeriwa atthu Awe. Munivahe, Pwiya. Hiyo ninliplelela mpantte ahu, voowiiyeviha, mwa Nsina na Pwiya Yesu Kristu. Amen.

¹² Kinrowa onvekela Munna Neville vano wira asome Soolempwa sa ohihimuwa. [Munna Neville oniira, “Matewu 28,” ni onsoma Yoolempwa enttharelana—Mol.]

[*Vaviralyaya esaapatu, oxaaka wa nihiku noopacerya na esumana, Maria Matalena ni Maria mukina yaahirowa oxejurya mahiye.*]

[Nto, naanaanoru, yaahikhumelela etetere yuulupale: maana nlaikha n'Apwiya naahikhuruwa wirimu, naahirwa khupirikixela nluku ota, khukilaathela.]

[Ekhalelo aya yaari ntoko overunya, ni soowara saya sootteela ntoko etthapwe:]

[Nto alipa-oolipelela yaahituthuwa vanci-ene mwaha woova, enakhala ntoko ookhwa.]

[Nto nlaikha naahiwiirela athiyan'awo wira, Muhoove: miyo koosuwela tthiri wira munimphavela Yesu, yoole aakhomeliwe vamwiikimanyo.]

[Owo khankhanle vaava: maana oohihimuwa, ntoko saahimalyawe. Murwe, moone nipuro Apwiya naixaathiw'aya.]

[Vano mwaakuveke murowe, mwaaleele awiixutti awe wira owo oohihimuwa mw'alipa-ookhwa; vano, nto, onoooola orowa oKalileya; weiwo t'unrowanyu omoona: vano, ela pitthu yaarin'aka woolelani.]

[Vano awo yaahivenya naanaanoru, omahiye iwe yoovaka ni etteliwaka murima vanci-ene; khutthimakela waaleela ehaal'ila awiixutti awe.]

[Etthimakasaka siisaale orowa waaleela awiixutti awe, nto, Yesu aahirwa okumana ni yaawo, khwaahimeerya wira, Mweetteke ni murettele. Awo yaahimwaattamela yahinvara inawu, khimukokhorela.]

[Vano Yesu ahaahimeerya wira, Muhoove: murowe mwaaleele axinn'aka wira erowe oKalileya, nto weiwo t'anrowaya okoona.]

[Vano erowaka siisaale, nto, alipa-oolipelela akinaku yaahirowa omuttettheni, khwaaleela makhulupale a anamukuttho sothene iye saakhumelenle.]

[Nto vathukumanny'aya n'ahumu, khwiwanana, waavaha anakhotto awo musurukhu munci-ene,]

[Yiraka, Muhimyeke wira, awiixutti Awe yaahirwa ohiyu, khwiya murutthu awe, awo erupaka.]

[Etthu ila yaphiya owaruni wa kuvernatooro, hiyo nnoomukupaliha, ni nnoomulipiherya owo.]

[Vano awo yahaakhela musurukhu, khwiirasa ntoko siixuttihiw'aya: nto wootha nno woomwaramwareya eriyari y'aYuta mpakha olelo va.]

[Vano awiixutti muloko ni mmosa yaahirowa oKalileya, omwaako Yesu waahimenry'awe.]

[Okathi waamoonaly'aya, yaahimukokhorela: masi akina a yaawo yaahimuhoverya.]

[*Nto Yesu aahiwaattamela khwaahimeerya, wira, Koovahiwa oweriya wothenene wirimu ni vathi.*]

[*Vano murowe, mwawiixuttiheke atthu a maloko othene, mwaapatisaka ni nsina n'Atithi ni na Mwaana, ni na Eroho Yowarya.*]

[*Mwawiixuttiheke weettela sothenene soorumalyakani: vano, nto, miyo kinookhala ni nyuwo mahiku othene, mpakha omala olumwenku. Amen. Nipuro vahiitthu mufiitani.*]

¹³ . . . yincererye iparakha Saya osommwa wa Masu Aya.

¹⁴ Vano naamuhimya wira, ohimya-tho vano, wira miteko so okokhorela, ni voosiisu, sinootthikela ewoora thanu na xexe ni minuutu miloko miraru, naanaanoru nimalaka-ru okhuma mwa ola, e . . . okokhorela nno wa voosiisu vano. Vano nto hiyo ninihana okokhorela wahu wa nsuwa niphattuwaka. Ni hiyo na, nookhalana itthu kamosa-kamosa so woohimeeryani sa mi-mithukumano sivinre. Ni nintthuna wira nyuwo munwereiwa ni ooxanka, othene anyu, murwe ni waamini voosiis'ula, mwaamini wira Yesu ula ohihimunwe onnikhala olelo, ni Owo mmosaru siisaale Owo aary'awe. Owo kharukununwe hata vakhani.

¹⁵ Vano kintthuna kisome nipuro naamukhaani na Yoolempwa va, emphwanyaneya kapiitulu 19 ya Yobi, opacerya versiikulu 15.

Ale ankhala mpa mwaka, . . . anamuteko aka anikoona ntoko mmalapo: ka namurwa vamaithoni vaya.

Koomwiihana murumeyi aka, nto owo khonikaakhula; kihaana onxonttela ni eyano aka.

Iphumu saka sihaaphweela amwaar'aka, axinn'aka khandthuna okaattamela.

Nave, axinamwane annikiveeha; kavenya awo annikitheya.

Apatthani aka othene annikithanya: nave-tho ale kaaphent'aka aakirukunuwela.

Makhuva aka aapharelela nikhuli naka ni ethayi aka, ni kinnivarelela nikhuli na maino aka.

Mukoonele othunku, mukoonele othunku, Xontte nyuwo mukhanle apatthani aka; maana ntata na Muluku nookikwannya.

Munkilupatthelani nyuwo ntoko Muluku, khinoophiyeryani erutthu aka?

Miyo kaaphavela wira moolumo aka vano elempwe! kaaphavela wira ehotthiwe muliivuruni!

Wira ehotthiwe ni nreka na yuuma ni ethhitiwe vanlukuni wa mahiku othene.

Tthiri miyo koosuwela...nvuluxa aka ookhala, ni wira wookiseryani onoovenya mulaponi:

Ni hata wira...axiitthu anoopwetexa erutthu ila, nlelo kikkhalaka n'irutthu aka yeela kinoomoona Muluku:

Yoomi ene kinoomoona,...maitho aka anonweha, kahi ntoko mmalapo; hata eyuunu aka epwetexiwaka muhina mwaka.

¹⁶ Kaatthuna kikuxe ntoko yoosoma vo, emphwanyaneya mwa Yobi 19 ula, *Miyo Koosuwela*.

¹⁷ Tiithi ula okathi ula aari mwa enamuna emosa ntoko siry'ahu olelo. Owo aari mooxankani wuulupale, ntoko siniihan'ahu, "maasi oowiixa," ni waahimmala ororomela. Mahiku manci-ene aanikilaathi vattuurani, ni aaniphavela ophwanya moolumo oomukurunuxa murima, aphavelaka ophwanya etthu yaarowa onvaha ominyala, ni etthu yaarowa—yaarowa okhala yo ohakalaliha wa yoowo okathi woon'awe ekumi awe emalamalaka.

¹⁸ Yoopacerya, owo aari mutthu mulweene, etthu ntoko miyaakha miloko mithanu na mixexe, nto owo aahimaniwa ni ntata na Muluku. Vano, hiyo noosuwela wira Muluku khaamukwanyale ni ntata Nawe, masi Muluku aamutthunihenrye Satana omukwannya. Muluku orina paahi alipa oowiira itthu. Muluku atthuna etthu yootakhala wiiriwa, Owo onimuhiyerya Satana wira aire. Ni Owo atthuna yooreera wiiriwa, Owo ohaana arumeyi Awe onaahiyery'awe wira.

¹⁹ Nto Satana aahimukwannya Yobi mwaha wa niwoko, omwehererya, okhala wira owo ni Muluku yaahikkhalana ovaanyihana. Vano Muluku khimuhimeerya Satana wira, "Kookhalana murumeyi elapo ya vathi, khuuvo onlikana n'uwo. Sothene sinimuhimeery'aka, owo onimwiira. Owo mutthu ooloka, ni naxariya."

²⁰ Nto Satana khwira, "Nyuwo mwakitthuniherya-ru paahi omukwannya, kinoomwiiriha owo wootakhalihani ohoolo Wanyu."

²¹ Yobi, ahisuwelaka itthu sothene iya siiraneya, saahimukeliha tiithi ula mooxankani wuulupale. Nnakhala vo, mwa enamuna emosa, okathi sothene simmalenly'aya, owo nlelo aahooniherya mukhalelo awe mwa—mwa Kristu. "Miyo koosuwela wira Nvuluxa aka ookhala," owo kuhimya.

²² Vano hiyo ninniphiyerya mapuro awo. Hiyo othene ninniphiyerya. Ni kinnaamini wira olelo, wira hiyo nithukumanne va mwaha w'etthu emosa ntoko niwoko nimosaru. Hiyo othene nri vattuurani. Hiyo nihaana mikattiyamiho sahu, ni sooreera ni soonanara sahu, ni oka—okathi ahu woonanara, ni iretta sahu, ni owereiwa wahu murima,

ni ovirikanyiwa wahu. Tivo hiyo ninoorwa siisa, wa voosiisu omosa, voosiis'ula wa Paasikha, wira niphwanye moolumo ookurunuxa murima, ntoko Yobi aaphavel'awe ophwanya w'axipatthani awe.

²³ Khaavo hata mmosa a awo aawerya omuhakalaliha murima. Okhala wira mukattyamiho awe, awo yaanimootherya wira aari natampi a wiphiini. Vano, varyari va mukattyamiho ole wothene, Muluku aahirwa omoopola.

²⁴ Yobi aamukoha, ntoko saasuwel'awe, kahi wira yaari eretta awe paahi ni ithuku sawe, ni mukattyamiho ni owereiwa murima, mwaha wo ompweteya amusi awe ni muhakhu awe wothene, saahala okuxa ekumi awe, masi owo aari mutthu mulweene, owuuluvala saana mwa miyaakha, ni asuwelaka wira aamurowa vathi mmahiye. Ni, asuwelaka yeeyo, owo aanaamini wira aahikhala mutthu aamuruuhale mulaponi, owo khaawerya orwa mu mmansawe. Ni aanisuwela wira owo aarwiiye mwa tiithi ni maama, masi, nnakhala vo, atiithi n'amaama yaahaana okhalana mutthu aaruuhale. Nto eyo yaamurowa yaamurukunuwa ethikelaka w'ephattuni, "T'ani omuruuhale ole oopacerya, mmosa?"

²⁵ Nto vo owo aanitikinihiwa ni yeela. "Etthu yootikiniha wira miyo kiri va, keettakasaka, ekumi y'osuluxa ovikana ele ekhanle mwaamunama, ni ekumi y'osuluxa ovikana ekumi ya miri." Masi nlelo hiyo ninniphwanya wira owo iirale, "Mwiri wakhwa vale, owo onookhala-tho. Ni wira n-nluwa nakhwa vale, nlo nnookhala-tho." Masi owo khwira, "Mutthu akhwa, owo onoovahererya munepa, vano ori vayi? An'awe annoorwa omunlela ni onvaha nttittimiho, nave owo khonsuwela." Nto owo aanitikinihiwa, "Yaari exeeni wira—wira Muluku aanihya ekumi ntoko ele okhala-tho, ntoko maluwa ni miri, masi mutthu khaawerya okhala-tho?" Sothene iya saahimutikiniha.

²⁶ Nto hiyo nakuxa-ru paahi mwa emaliheryo ela voosiis'ula. Nto ti yeeyo ekhalenly'ahu va. Hiyo noomwiiwa wahala a Paasikha, imaara sinci-ene, ni noomusoma nno ni nno; nto olelo, mwa soohimmwa sa muraatiyuni mwahu, munoowiiwa arumeyi oohiyana-hiyana emulaleyaka yoowo. Masi etthu kuupuwenly'aka, wa nikhuru naka voosiis'ula, Apwiya akivahaly'aya, kaamurowela mwa moonelo mmosa woovirikana kaawenrye, kiphiiyeryaka nipuro na: Xeeni hiyo ophiiyeryaka mikattyamiho iya? Exeeni enikhumeleliha ithu iya? Xeeni vaatthuney'aya muKristu okhala oovela-vela? Xeeni saahaarow'aya, sothene wiiraneya oratteene wa muKristu? Masi kheniira, ni hiyo noosuwela.

²⁷ Nto imaara sikina hiyo ninnikhalanaxa mikattyamiho okathi onkhal'ahu muKristu ovikana saakhalan'ahu okathi waary'ahu anatampi. Tthiri, Eyo yoolempwa, "Mixankiho sa naxariya ti soowaatta, masi Muluku onnimoopola mwa

sothene.” Muluku oolaiherya mixankiho sinci-ene, miyoonelo sootikiniha, ni itthu sootikiniha saarowa ovikana osuwela wahu, masi kweekwe simpakeliwa mureerelo ahu. Hiyo khaninwerya osuwela saana, okhala wira, naasuwela, weso khiwaarowa okhala waamini wa hiyo; naamurowa n’usuwela. Masi hiyo ninneetta, ni nookhalana, ni ninnaamini mwaha wo waamini, Masu Awe, wira enrowa ovara etthu yoonireerela. Vaakhanle wira naaniwerya osuwela saana yeeyo olelo, vo—voosiis’ula. Vaakhanle wira naaniwerya osuwela saana wira mixankiho sahu sothene. . . Ni wira khaavo a hiyo ori oohiphwanya iyo. Ni vaakhanle wira naanisuwela wira itthu iyo ti sa mureerelo ahu!

²⁸ Yoolempwa, mwa emosa wa Soolempwa mBibiliani, wira, “Wehereriwa oniruheliw’ahu, wootepa oreera wa hiyo ovikana eweero ene, maana ti Muluku onnivaha wehereriwa nno.” Vammal’ahu okhala mureerelo Awe, olapa wahu ni opatiiso, ni natiri ahu wo weetta mwa makhalelo wa Yoowo, nto khula wehereriwa onnirweela ori wira onireerihe voomalela wa ovuwa Wawe. Eri wira eniruuhe nipuro Muluku okhanly’awe wiikhalihxaka Mmansawe eekeekhai wa hiyo ovikana Owo saary’awe wehereriwa ohinatthi orwa.

²⁹ Kintthuna kiitakanxe voosiis’ula ni Yobi, kihimye wira kookhala vanci-ene voophiyerya osuwela wira eyo Ekeekhaii. Miyo kihoona eyo mwa makhalelo aka, wira khula okathi enkhumel’aya etthu yuulupale, kihinwery’aka oxerekela, wala ovira vathi vaya wala vasulu vaya, Muluku onnipaka ephiro, n’ukhuma voovuwa. Kinniikoha tu moota mahala Awe kweekwe aniir’aya, masi Owo onniira.

³⁰ Nto muupuwele, mwa itthu sothene iya, Satana oneererya onikhaliha ooviruwa, ni ooxanka, wira anuupuweliheke, “Oh, ekhumelenle-ni *yeela?* Xeeni yahaakhanly’aya okhalaka *sa?*”

³¹ Mahiku vakhani avinre okathi waakhum’aka nipuro nimosa, nooreerexa ni nookarexa kitonko aka wona makhalelo aka othene, yaari empa yuulupale ya munn’ihu, Oral Roberts. Okathi woonaly’aka myala iye soolipa, ni woohikhala ecanela hata nipuro nimosa, masi moota yaalipihw’aya! Ni kootoko okhala oHollywood ni kinnikhalaka mampa a mamwene, ni kinnikhalaka mapuro othene yaakhanle okhalaka, ntoko, mulaponi mothene, ni mapuro othene, ni ipa soovuwa ni soophenteya, masi nkinatoko wona etthu p’itthu, hata nipuro, noolikanyiha-no, ni yeeyo, hata nipuro nnakhala. Moota ifiiyu sikhani s’alumiiniyu sinthavan’aya m—mpaani vamosa, ni, oh, nkinatoko wona etthu p’itthu yookarexa makhalelo aka othene. Okathi weettaly’aka kiviraka mme, khukuxa matat’aka khutitikithela minlaano iye sa maripu, ni—ni mukwili ule muulupale; sothene ni mukhalelo wa oraaru wa Tithi, Mwaana, ni Eroho Yowarya, o—ohotthiwa waya. Itthu sothene iyo! Kammalaru orwa kikhumaka wa Munna Tommy Osborn, ni kaahoona muteko awe, muulupale iwe wa Apwiya.

³² Kaaheemela vate, khutthikela oweha emp'ele, nto khuupuwela, "Muluku, tthiri kinnikhala namirima miili, tthiri kinnikhala oovalaaniwa, nipuro nlo; maana, miteko s'axilopwana ala sikhumme mw'awaka." Nto khuupuwela, "Exeeni? Khino kirookhala oohiroromelaxiwa, Pwiya, wira Nyuwo khamwaawerya okiroromela ni etthu p'itthu siisaale. Hata yaamukhaani, itoolare vakhani Nyuwo mukitthunihenry'anyu oliverya ikampaanya ni itthu, vano awo aneererya okiroiha mukhatteya mwaha wa seiyo. Nto xeeni miyo okhalaka namirima miili, wala kinkhalela-ni mutthu oohiroromeliwa?"

Kaari vattuurani, ntoko saary'awe Yobi a khalayi.

³³ Okathi weemenly'aka vate vale, kahaawery'aka hata omumula, mwaha munnuwelo ole; wira mmiravo mmosa oohaawa oyariwe nipuro nimosa nowiipitheya, muPentekosite, aawery'awe wira ni oruha eyo mpakha emp'ele yuulupale saana. Nto miyo khuupuwela, "O Muluku, khino miyo nkimpchwanela."

³⁴ Okathi ene yoowo Nsu naamukhaani khurwa munvireloni mme, khwira, "Masi Miyo ka mpantte anyu."

³⁵ Vano miyo khuupuwela, "O Pwiya Muluku, oh, muhiye eyo ekhale siiso, weso, Pwiya. Miyo . . .okhala wira nkaarowa okhalana ankhili oovara muteko muulupale ntoko ole wa Nyuwo. Ni miyo ka mu—mutthu oohisoma. Masi, vakhalaru wira Nyuwo mwa mpantte aka, miyo k'Awinyu, ni Nyuwo munookeettiha. Nkaawerya wiiseettiha mmansaka. Masi, O Pwiya, mukeettiherye!"

³⁶ P'ukathi yoowo muulupale onnisukhumela mapuro ale oowaarya. Waari mBibiliani. Ni muupuwele, hata wira ovela-vela iwo wunnunwe moota xeeni, Satana khonwerya okumiha ekumi anyu mpakha Muluku omaliha ni nyuwo. Khiivo hat'etthu ekhanle wookhumelelakani vahikhanle wira Muluku onootthuniherya. Khaavo hata xetwani onwerya orwa vahikhanle wira Muluku onootthuniherya. Nto eyo ti ya mureerelo anyu Owo oniirel'awe yeeyo. Nrowe nuupuwele.

³⁷ Iwe okathi maasi oosarya jaarwenly'aya opwetexa olumwenku, khiyaawerya ompwetexa Nowe. Nowe khaakhanle opwetexiwaka, okhala wira Muluku aahikhalana muteko wira owo avare.

³⁸ Nihiku nimosa, elapo emosa yuulupale ary'ene mw'epotthani wuulupale, yaahikhala aana kamosa-kamosa aHeperi ninaasuwel'ahu ntoko Xatraki ni Mexaki n'Abedinego. Nto vaahiphierya nipuro awo yaarin'aya othanla, wira etthu yaahaana wiiriwa. Awo yaahikhalanasa . . . Waamini—wa—waya waahiruuiwa mowehereriwani.

³⁹ Nto okathi waamini wanyu oniheliw'aya mowehereriwani, vano muhivonye. Mukhale ni yeeyo munaamini anyu.

40 Nto okathi waamini waya waaheliw'aya mowehereriwani (Nto awo yaahivira okathi muulupale, kahi wira paahi awo yaarowa va—vattuurani, masi awo yaahikelasa muttukutthani mwa mooro, masi Satana khaawerya waapwetexa, maana etthunelo ya Muluku nlelo khayaamaliheriwe.), awo yaaniwerya ovolowa mme ni nrromelo: “Miyo koosuwela wira Nvuluxa aka ookhala!” Awo yaaniwerya ovolowa mme ni nrromel'ola va, “Hiyo nookupali wira Muluku onniwerya onivuluxa muttukutthani mu mwa mooro, masi, nnakhala vo, khaninrowa wuuramela elatarato.”

41 Satana khaawerya waakuxa. Owo khaawerya omusamiha Nowe moohuruwelani, mpakha etthunelo ya Muluku omaliheriwa. Owo khaawerya waapaha aana aHeperi, mpakha etthunelo ya Muluku omaliheriwa. Owo khaawerya omwiiwa Yobi ni ithuku ni mikattyamiho, mpakha etthunelo ya Muluku omaliheriwa. Nnakhala akharamu khiyaawerya omukhuura Daniyeli, mpakha etthunelo ya Muluku omaliheriwa. Nnakhala okhwa ni wuulvala khisaawerya omukuxa Abrahamu, mpakha etthunelo ya Muluku omaliheriwa.

42 Ni nnakhala khunwerya wookuxani, wala khunwerya okikuxa, mpakha etthunelo ya Muluku, wa ekumi ahu, emaliheriwe. Tivo, hiyo ninnikuxa vaavo, okurunuxiwa murima.

43 Nto xeeni Muluku ohiyaka mikattyamiho orwa? Muluku onootthuka mukattyamiho, khuhela eyeemexeryo mwaano mwaya wira omwiiwelele Yoowo, nto mikattyamiho iyo sinniniruha mopatthanani vakhiviruxa ni Muluku.

44 Khiyaakhanle hata ekhweyi mpakha orwa osarya wa maasi. Masi Nowe vaamanly'awe opuruleliwa mukhalel'owo owo aary'awe-mo, ophempa mahiku miloko mixexe ni ohiyu, muhina mwa mwanankhaya, ni ekalawa yaamukhaani ettelemaka osulu ni vathi mmaasini; eyo yaari numala osarya maasi, owo oonaly'awe ekhweyi emaara aya yoopacerya, waataana wa nrromelo, waataana wa natiri. Vaamanly'awe ovira moohaawani, nto aahimoona natiri.

45 Ti siiso munimoon'anyu natiri, vammal'anyu ovira moohaawani. Miyo ennikisivela epoweema ele, ahiiso esalmo:

Kihaana oroihiwa owaani Wirimu
Voolilini va maluwa,
Akina ewanne-ene wira etthuveliwe
Ni evinre-ene mphareya mw'ephome?

46 Hiyo ninvekela opuha ni murettele. Muluku onnivaha yooreerexa Owo aakhanly'awe onivahaka: wehereriwa ni ohaawa. Eyo ti yootepa oreera ovikana opuha ni murettele. Opuha wahu ori epantte ekina ya muro.

47 Yaari mpakha aana aHeperi yaakhanyereriw'aya okela muttukutthani mwa mooro, mwa omosa wa wehereriwa waya woolipexa, awo yaamoonaly'aya Mmosa ntoko Mwaana

a Muluku eemenle-ene eriyari aya. Mikattyamiho saya saahimukumiherya Mwaana a Muluku eemenle-ene eriyari aya, mooriiryani, wira osusihe niwimpi na oviha. Masi kahi mpakha awo yaarowaly'aya vaikho Mulipa-ookhaliherya owo aarwiiy'awe.

⁴⁸ Aari Daniyeli aalakenle vamurimani vawe ohiinanariha n'itthu sa molumwenkuni, ni aahikhanyereriwa ovira mowehereriwani, sinto aarowa onvekela Muluku ahiiso okela mulittini mw'akharamu. Masi waari numala oheliwa mooro, vano owo khuriheliwa mulittini mw'akharamu, wira, numala yeeyo, owo aahoona Nlaikha n'Apwiya neemenle-ene eriyari awe, nittiyelelaka Nlumi nle na Mooro nuulupale neemenle-ene eriyari ya owo n'akharamu. Vano akharamu khayaawerya onvara, okhala wira owo aahivira mowehereriwani ni mottehattehiwani ni mmikattyamihoni. Ni owo aanisuwela wira Muluku awe aaniwerya onvuluxa mwa yeeyo.

⁴⁹ Aari Abrahamu, numala woona etthaya okhala yoohiruwerya, ni ethaawuni orwa, nto Lothi khwiivalaaniha khurowa okhala voopuha molumwenkuni. Waari okathi vaamanly'awe wiiwa ohihimerya ni wunlaseya wa—wa amakampusi, yahaarina malaxi a inyompe, masi owo aahikhala muttetthe Muluku aanvahaly'awe khimuleela wira ette memmo. Nto ntoko nihiku nlo, vaamanly'awe wehereriwa mpakha ovi—ovilela wawe omala, naari nihiku nenlo, okathi wehereriwa omanly'aya, owo aahilavula ethoni n'ithoni ni Elohim vathi va mwiri karvalyo nihiku nenlo. Waari numala owo ohaawa wehereriwa wawe, vaamanly'awe ovira mmikattyamihoni owo aavinry'awe-mo, Muluku aamukhumelenly'awe ni mukhalelo wa Mutthu; khukilaathi vale khimuleela wira owo aahithela ni nsina n'mwaar'awe naari Sara, ni khwira wira owo aahimutheya Owo, muheemani ottuli. Waari vaavale Abrahamu aamwiihann'awe Owo "Elohim." Waari numala wehereriwa ni ohaawa.

⁵⁰ Oh, vaakhanle wira Ekereja yaaniwerya paahi ovenya Mmansaya olelo, wira esuwele wira numala mikattyamiho ni wehereriwa, ni otheiwa n'uveehiwa, itthu Ekereja enivir'ayamo, Ekereja ya Pentekosite, nnimoon'ahu Muluku eriyari ahu, apakaka ithooneryo suulupale, ni sootikiniha.

Numala miteko ni mikattyamiho sa nihiku,
Numala sothene ovira,
Nto vookiserya ninoomoona Yesu.

Owo onrowa okhala akilipelelaka,
Yesu naxariya ni ooromeleya,
Veehicensi Vawe yooreera,
Owo onooonaakhela Owaani
Numala nihiku ovira.

Nlelo ory'ene othana, nivare muteko.

⁵¹ Alopwana ala othene aalupale, yaarowa okuxa vanci-ene muteko ahu wa voosisu, okelela ohimya yeeyo. Awo yaavira mowehereriwani, ni yaahimoonā Muluku. Awo yaahivira mowehereriwani, khoona Malaikha. Awo yaahivira mowehereriwani; ni miyuupululo, ni yaahoonā ithoonyeryo ni sootikiniha, ni itthu.

⁵² Masi, oh, khaavo hata mmosa a awo oonale etthu Yobi oonaly'awe. Alopwan'ale othene, numala woonā Malaikha, ni omoonā Muluku ni itthu iyo sothene, awo khanatoko woonā hat'etthu yo waavaha miroromelo epantte ekena ya mahiye. Masi Yobi aahoonā ohihimuwa! Owo aahimoonā Paasikha. Owo aahoonā etthu enkurunuxa khula murima. Vano voonaly'awe, "O vaakhanle wira moolumo aka yaatthittiwe muliivuruni! O vaakhanle wira yaahotthiwe ni mureka wa yuuma, vamwala!"

⁵³ Moone, eyo, itthu sothene saahimurukunuwela sinvirikanyaka. Awawe, hata arumeyi awe khayaalavula n'uwo. Amwaar'awe yaari mmalapo. Owo aakilaathi vale, vattuurani, wehereriwa iwe wuulupale. Vano ekereja khurwa, khimurukunuwela ettuli owo, mahiku mathanu na manli. Ni khaavo aamukurunuxa murima!

⁵⁴ Nto aahaana wira oonne yoowoona ya Paasikha, okathi aakhuwenly'awe, "Miyo koosuwela wira Nvuluxa aka ookhala, nto mahiku ookiserya Owo onoovenya elapo ya vathi. Miyo koosuwela! O vaakhanle wira moolumo aka yaalempwe ni mureka wa yuuma, vanlukuni, vaakhanle wira moolumo aka khiyaakhanle olakaseyaka, maana miyo koosuwela wira Nvuluxa aka ookhala! Miyo koosuwela! Miyo koosuwela!"

⁵⁵ Munsuwela-ni nyuwo, Yobi? "Miyo koosuwela wira Nvuluxa aka ookhala." Mooweha, kahi wira aari Mutthu aakhala paahi, masi Owo aari Nvuluxa wa Yobi!

⁵⁶ Oh, nttotopeliwe Nsina n'Apwiya! Kinnitthapa okhala mpantte wa Paasikha, wira ka mpantte wa ohihimuwa iwo! Nto hiyo na mpantte a yoowo voosis'ula, okhala wira mwa hiyo ennikhala Ekumi ile ya ohihimuwa (eyo ti wi, oowira mpantte) emuruuhale Paasikha. "Miyo koosuwela wira Nvuluxa . . ." Munsuwela-ni nyuwo? Miyo nkinaakanyerya eyo; hiyo khinreerane waakanyerya mahiku ala. "Miyo koosuwela wira Nvuluxa aka ookhala!" Ayo, mulopwana.

⁵⁷ Vano Owo aari exeenii? Vakhala wira Owo aari Nvuluxa wa Yobi. "Aka," ya mutthu, aka, "Nvuluxa aka ookhala!"

⁵⁸ Nto exeeni-tho munsuwel'anyu, Yobi? Moonale exeeni mowoonani mme? "Nto mahiku ookiserya, Owo onoovenya mulaponi. Nto hata axiitthu epwetexaka erutthu aka, nlelo mw'erutthuni mwaka kinoomoonā Muluku, Yoowo kinrow'aka omoonā yoomi. Miyo koosuwela wira Nvuluxa aka ookhala, ni Owo onoovenya nihiku nookiserya mulaponi. Hata eyuunu aka epwetexiwaka muhina mwaka, hata axiitthu epwetexaka

erutthu aka, nlelo nnikhuli naka kinoomoona Muluku.” Vaavale yaahikhala yoowoona yuulupale.

⁵⁹ Daniyeli oonale Nlaikha. Aana aHeperi yaamoonale Mwaana a Muluku. Nowe oonale ekhweyi. Abrahamu aamoonale Muluku, ethoni ni ethoni. Masi, Yobi oonale ohihimuwa, Yobi oonale ohoolo. Axitiithi othene ni masantu aalupale, a mBibiliani, yaahiweha ohoolo nihiku nle; ni ekupalelo, mwa soowoona saya, mwa miyuupululo saya, wira waamoorwa okathi wa ohihimuwa.

⁶⁰ Vano hiyo ninnoona miteko suulupale orowa ohoolo. Ninnoona owerya wuulupale wa Muluku. Ninnoona itthu suulupale Owo aawery’awe wira. Khimwaakhanle owehaka nsuwa ni—ni osuwela wira kuhiyo Owerya wa Muluku oniruuha olumwenk’ule orukurerya nsuwa nle. Khimwaakhanle woonaka okathi w’ephovo orwa muhisuwenle wira aahikhala Muluku. Munniwerya woono ovonihiwa wa maitho oohoona, maaru oottiyana, musuwele wira ti Muluku. Masi ankhi eyo yaari yothene yaakhanle, nto n’ukhwa hiyo khumalamala? Masi ohihimuwa, Paasikha, oh, ti yeeyo etthittale ekanyeryo sothene Muluku otonko awe olaiherya, waari ohihimuwa.

⁶¹ Nto awo ahaana okhalana okhomeliwa, muhinatthi okhalana ohihimuwa. Ni Ekereja ehinatthi owerya woono Owerya ohihimunwe, kihinatthi woono muteko musya wiiraneya mmansaka, muhinatthi okela mopatthanani mwa naanaano ni Muluku, ohaana okhala wiikhomela vamwiikimanyo wira okhale ohihimuwa. Nihaana okhwa wa miyuupuwelo sahu yoohi, okhwa wa iphiro sahu yoohi, okhwa wa itthu sothene sinnirukurerya, ovira mowehereriwani ni mohaawani, wira niwerye woono ohihimuwa wa naanaano, Ekumi esya. Natampi ahinatthi okhala muKristu, okhwa ohaana orwa, vano ohihimuwa.

⁶² Abrahamu ahinatthi owerya omoona Elohim, saahaana okhala miyaakha miloko miili ni mithanu so wehereriwa. Aana aHeperi ehinatthi owerya omoona Mwaana a Muluku, awo yaahaana okela muttukutthani mwa mooro. Daniyeli ahinatthi owerya woono Nlaikha, owo aahaana okela mulittini mw’akharamu. Yobi ahinatthi woono ohihimuwa, owo aahaana okela ni ompweteya itthu sothene saarin’awe; masi numala, ni yoowoona, owo aahoona!

⁶³ Nto vakhala wira Yobi mwa yoowoona aaniwerya omweemererya saana natiri, waahitepaxa hiyo wira, vamanly’awe Kristu ohihimuwa mw’alipa-ookhwa khukhala Milipu Soopacerya w’ale yaarumpe, ni khuveleeliha Eroho Yowarya ntoko ekanyeryo ya natiri, wa hiyo, wira ni hiyo nikhale akumi. “Okhala wira Miyo ka mukumi, nave-tho nyuwo mwa akumi!” Noonaka Mukhalelo Awe muulupale eriyari ahu, ovaraka muteko, opakaka ithoonyeryo ni sootikiniha imosaru

Owo iraly'awe elapo ya vathi, anivahaka miroromelo. Nto hiyo ninoorwa wo ohihimuwani, vano nto ninakhala vamakutthani vahu v'ettuura? Nrowe nikhume vanikutthani v'ettuura olelo, ni yoowoona ya naanaano, ni Owerya wa naanaano, ni etthunelo ya naanaano wira nimoone Muluku mwa Owerya Wawe. Hiyo ninnoona ohihimuwa wa itthu sinrwa.

⁶⁴ Hiyo nri okathi wo okhwa. Ninkilaathi mmikhorani mwa okhwa. Ilapo siri mmikhorani mwa okhwa.

⁶⁵ Ruusiya oomuupuwela kapwitthi musya vano, ntoko nyuwo othene siiwaly'anyu muraatyiuni ni etthu. Awo kharina orwa nno n'umoopa ni musika. Awo anoowerya paahi oruha etthu emosa yaamukhaani nno, n'ukhala eriyari y'anamahottela aya, ni ovuuviherya etthu yaamukhaani wa khula elapo, nto atthu othene anookhala oowuuma nantirya mwa iwoora miloko miili ni xexe. Orwa nno ni, okathi onvenyaanyu, ori Muruusiya oomanakani mpararini, kwarta muulupale Muruusiya akuxaka etthoko anyu, aatuphelaka amwaar'inyu, aarihelaka an'inyu mphironi, ni akuxaka etthoko anyu. Awo anniwerya wira. Khayaarowa waapweteya hat'etthu. Awo aakhalanasa. Khaavo onsuwela exeeni iyo. Moone, sothene sivaraka muteko muhina. Vano awo anoowerya omurumeela owo ni ohoova, okhala wira khaavo-tho mukina orina.

⁶⁶ Hiyo khanisuwenle moota onrow'aya orwa, etthu enrowa okhumelela. Masi ninnisuwela etthu emosa, wira niri vanikutthani v'ettuura. Elapo, eri vanikutthani v'ettuura. Olumwenku ori vanikutthani v'ettuura.

⁶⁷ Ni okhala wira olumwenku ori vanikutthani v'ettuura, kinnitthapa vanci-ene wira Eroho ya Muluku enniwerya orwa, ni ninoowerya wira, "Miyo koosuwela wira Nvuluxa aka ookhala, nto nihiku nookiserya Owo onoovenya elapo ela!" Nihiku nlo Owo onimoorwa! Khivanxankiha namalepa silempy'awe:

Akhalaka, Owo ookiphenta. Akhwaaka, Owo ookoopola.

Avithiwaka, Owo ooroiha ottaiwene itampi saka.

Ahihimuwaka, Owo ookikhaliha naxariya mahala-ene.

Nihiku nlo Owo onimoorwa, oh, nihiku noovuwaxa!

⁶⁸ Aatthuneiyе Ketisimani, a mattonttoni a Ephome ephovaka esapala Awe, eyo ehinatthi. Ni waatthuneiyе owereya woosoosiha murima wa oKalvario, ehinatthi orwa okeekhai wa Muluku Ohinimala Yoowo aawerya waahihimuxa alipa-ookhwa. Aatthuneiyе e—aatthuneiyе Ketisimani ni Kalvario, wira simpake Paasikha. Vekeekhai saahittuneya.

⁶⁹ Moota arummwa ale, voosiis'ule, okathi yaaris'aya oowooceya saana, mpakha Petru wira, "Nkireere wooceya,

kookupali wira kinoorowa katthikele ototha ihopa. Kinootthika. Miyo—miyo koomoona Owo.”

⁷⁰ Awo yaahikhalana miroromelo suulupale, ni yaanaamini ni sothene, mpakha yaaphiyenry’aya nipuro nle nooriipela. Muluku iira-ni? Owo aaruuha arummwa ale vanikutthani n’ettuura. Owo aaruuha nipuro nimos awo yaarow’aya—awo yaarow’aya okhalana waamini waya woolipiheriwa w’awo.

⁷¹ Nto Petru khwira, “Miyo—miyo koomoona Owo opaka miiriirya suulupale oKalileya iwe. Masi, oh, Owo ori epantte ekina, ookhwa, ni ooriirya, mmahiye! Kookupali wira kinoorowa ophareya voosiis’ula karihe ntthavi, kirowe katothe ihopa tu. Khino kinoowerya oweha okhopela iwe wa ephareya, nto kinoosuwela. Kinnuupuwela kimoonaka Owo okathi waanilipilenly’awe muxerexere w’ephareya. Kookupali wira kinoorowa tu.”

⁷² Nto arummwa khwira, “Moosuwela? Kookupali wira kinoorowa ni nyuwo.” Oh, awo yaari oonyohowa. Awo yaahinlasa mpakha maitho aya wiipakaseya.

⁷³ Moota onsuwel’ahu ovira mapuro awo! Moota onsuwel’ahu! Hiyo othene ninnisuwela itthu iyo.

⁷⁴ Kinnuupuwela okathi waamuhenly’aka oophentiwa mmosa omahiye iwe, wu vasulu vamwaako wu, oniihaniwa Onkhuma nsuwa, ahiiso Omahaie wo Walnut Ridge. Moota waamuhenly’aka tutthu mwaamukhani mme! Nto kaaninla mmoononi mw’ame aka, mpakha, kaahinla mpakha ohiverya-tho wunla. Kaahiira sothene kaasuwel’aka. Mpakha, omukuxa kapwitthi, kinaphavela wiisiiva, kaari mwa okathi mmosa woorika. Nto waari okathi yoowo, musaala mme yaamukhaani, kikokhonre-ene, Erimu yaatthikenly’aya otthukuwa, nto khumoono owo eemenle-ene iwe wowaaryani wo ohikhwa. Waari okathi yoowo koonaly’aka miyoono sawe okipatikha, khwira, “Bill, khamunsuwela saana. Hiyo nri vooloka saana woovikanani nyuwo.”

⁷⁵ Moone, ontthuneya wiikhomela vamwiikimanyo. Entthuneya onyakattiwa wa nluwa, wira okumihiwe wunkhela waya mwa nenlo. Ontthuneya onyakattiwa w’ekumi, wira ephwanyuwe yooreerexa ya ele ekhanle. Mwaha wa yeeyo Yesu aarin’awe onyakattiwa, wira ekumihiwe ele Owo aary’awe. Owo khaakhanle weemela ohinatthi okhomeliwa, wira, “Koovahiwa owerya wothene Wirimu ni vathi mmatatani mwAka.” Masi numala okhomeliwa, Owo aaniwerya weemela ni wira, “Koovahiwa owerya wothene Wirimu ni vathi mmatatani mwAka!” Masi eyo yiinre exeeni? Waatthuneyiye okhomeliwa vamwiikimanyo toko.

⁷⁶ Waatthuneyiye onyakattiwa ni ovirikanyiwa wa arummwa. Awo yaahimoona Moopoli aya, Ole awo yamphental’aya, ni yaahimoona Owo hata ohihimunwe-ene mw’alipa-ookhwa

okhuma m—okhuma mmahiye. Awo yaahimoona Owo wira yeeyo. Vano nto wuupuwela, “Owo ori iwe, ooriirya, mmahiye, Mmansawe, voosiis’ula.” Yaatthunekiye e . . .

⁷⁷ Atthu ale yaahimoona Owo otthukula maitho a atthu oohoona, yaahimoona Owo weemela vale ni olamula miyuupuwelo sa mmurimani mw’atthu, “Owo ahaasuwela sayi,” awo yaamwiira, “wira yaamurweela Yoowo? Owo aasuwenle sayi? Xeeni Owo ahaamusuweleny’awe Yuta, wira Yuta aamurowa—aamurowa omulupattha? Xeeni Owo ahaasuwenly’awe wira anatoropa jaarwa owela mmyaakoni mme, ni itakwarikhwa ni ikatana ni sothene, wira envare Owo, vakhala wira Owo aaniwerya olamula miyuupuwelo saya?”

⁷⁸ Moone, xetwani aavara muteko mwa yaawo, aahelaka vanikutthani v’ettuura, maana yaatthuna waavaha onamoona wa “Miyo koosuwela.” (kahi “Kinoona wira” wala “khino ti siiso.”) “Miyo koosuwela! Miyo koosuwela!”

⁷⁹ Nto muupuwele, wehereriwa iwe munruuheliwa nyuwo enamuna emosaru, wira muhiire, “Ahe, khino Ela ti yoolikana, khino Yoolempwa ekeekhaii, khino ovoniha w’eMuluku ti w’ekeekhaii, khino Eroho Yowarya ti y’ekeekhai.” Masi mwakhalana-ru musuwelelo owo ni okhuma vanikutthani v’ettuura vo, khuphwanya muupululo wa Muluku, ni opatiiso wa Eroho Yowarya, munoowerya okhuwela, “Miyo koosuwela wira Nvuluxa aka ookhala, okhala wira Owo onkhala mwa miyo!”

⁸⁰ Petru iirale, “Kinrowa otho ihopa.” Arummwa khwira, “Kookupali wira kinoorowa ni nyuwo.” Nto vo jaarisa vanikutthani v’ettuura, ohitto iwe eriyari y’ephareya, nto mukattyamiho orowaka enamuna waary’aya. Nto kinniwerya omwiiwa mmosa aya wira, “Oh, vaaweryaneya sayi wiireya, Petru? Vaaweryaneya sayi okhala etthu iyo wira Mutthu ntoko ole okhwa? Vaaweryaneya sayi Owo oheliwa mmahiye enamuna siheliiw’awe? Vaaweryaneya sayi Owo weemela waahiya awo osenyela wiitho Wawe ni orocola ireru, onwariha ekhar’ele vamuru Wawe? Vaaweryaneya sayi Owo wira eyo, oh, ni nlelo khunakhala Muluku? Nkinwerya osuwela saana.” Oh, ovirikanyiwa xeeni!

⁸¹ Nto naanaanoru, awo khuweha oxerexere w’ephareya, muupululo mmosaru yoowo Yobi aarin’awe, iwe awo yaahoona ele Yobi oonaly’awe miyaakha ikonto xexe khalayi. Vale aaphwanyaneya Nvuluxa, mukumi ni musya, emenle-ene oxerexere. Mooro opattihiwe-ene, ni ihopa saapeiwe-ene vaavo siiso, nto khwira, khwaalattula.

Yesu ookhalana meesa ootthokihiwa
Vaavo atthu oowaarya a Muluku anlyihw’aya

Owo onnaalattula atthu Awe oothanliwa
 “Rwani mulye;”
 Ni emana Awe Owo onninyi
 Ni onninyi khula entthun’ahu;
 Oh, eyo, ti yooreera olya ni Yesu okathi
 wothene!

Moota okhanly’ahu wuupuwela eyo, moota saatthuneyi’aya
 itthu iye suulupale!

⁸² Moota e... Paulo murummwa, murummwa ole muulupale
 aavinre okathi awe wa mukattiyamiho okathi waakhalenly’awe
 onamoona okhwa wa Sitefano; ni woonaly’awe ethoni awe
 yaamukhaani ewehaka Wirimu, ni maluku emmanaka wiitho,
 nto owo khuweha osulu khwira, “Kinnoona Wirimu otthukuwa.
 Kinnimoona Yesu eemenle-ene moon woolopwana wa Muluku.”
 Owo khwira, “Pwiya, muhaalamulele etampi ila.” Nto Paulo
 ovarenle-ene soowara, saamuwarinh’aya isumana isumana sene
 vanikutthani v’ettuura, eettaka nno ni nno; mpakha, muupuwelo
 awe okhala woopahuwa, mpakha waarow’awe oTamasiku, wira
 aphavele enamuna y’okhuma, ntoko mutthu onrowela esuupha
 ya wiskhi, ophavela osamiha muxankiho awe.

⁸³ Owo aari eriyari ya yeeyo, okathi naarwiiy’aya Nsu
 nimos okhuma Wirimu, Waarya wuulupale khwira, “Saulo,
 Saulo, munikilupathela-ni?” Owo aahimoona Owo. Owo
 aahimusuwela, wira Owo aari Yesu aahihimunwe, Yoole
 aamukhalenly’awe onamoona wo okhwa, aahihimuwa.

⁸⁴ Oh, kinniwerya wuupuwela ekumi aka, kirowaka
 opwetexiwa, okathi wiiwaly’aka Nsu noomaaleleya, “Miyo ka
 Yesu. Miyo kaahikhwa, Miyo ka mukumi voohimala. Okhala
 wira Miyo ka mukumi, nave-tho nyuwo munookhala akumi.”
 Okhuma okathi yoowo, kihelaka ntata naka mwa Nawawe,
 kinnimuroromela Yoowo kivraka mapuro ooriipela. Okathi
 vamphiyery’aka nipuro vahinwery’aka woona, ephiro xeeni
 onrow’aka, nlelo kinnimuroromela Yoowo.

⁸⁵ Khula mulipa-oowaamini muKristu ohaana okelihiwa
 mowehereriwani mmo. Khula mulipa-oowaamini muKristu
 ohaana oheliwa vanikutthani v’ettuura, wira akhume ni
 musuwelelo, “Miyo koosuwela wira Nvuluxa aka ookhala!”

⁸⁶ Hiyo khaninrwa va voosiis’ula wira nikilaathi paahi ni
 olavula mwaha mmosa w’ehantisi, okhanle wothene ekeekhai,
 masi ninrwa va ni onamoona voosiis’ula, “Miyo koosuwela wira
 Yesu Kristu Mwaana a Muluku, koosuwela eyo woohikhala hata
 ohoverya! Miyo koosuwela wira Owo oohihimuwa mw’alipa-
 ookhwa, ni Owo onkhala mwa miyo olelo. Owo t’awaka ni miyo
 k’Awawe. Miyo ka mulipa-oorithi ni Yoowo, Momweneni mwa
 Muluku.”

⁸⁷ Paasikha! Paasikha onniruuha etthu yuulupale, ohihimuwa,
 nrromelo musya. Moophwanya owo voosiis’ula? Ori mmurimani

mwanyu? Munnisuwela wira Nvuluxa anyu ookhala, ni Owo onnikhaliha sothene ovara muteko vamosa?

⁸⁸ Nyuwo muniira, “Munna Branham, miyo kikilanthé va, kilipelelaka eliinya ya mavekelo.”

⁸⁹ Muluku onvara muteko oratteene wa ele yooreera. Xeeni mwammirav’ole oophenteya, nihiku nle, aary’awe oohoona okathi oyariw’awe? Wira Muluku aphwanye ovuwa ni avirikanye muttetthe. Tthiri, Muluku onnisuwela etthu Owo eniir’awe. Muluku onnisuwela. Nto Owo onnihela vanikutthani v’ettuura, wira onooniherye ovuwa Wawe.

⁹⁰ Tivo, voosiis’ula kinihimy’aka ela, apatthani. Nuvira miyaakha miloko miraru ni mmosa sa orumeyi, nuvira miyaakha miloko miraru ni mmosa sa miteko vapuwani, kintthuna kikhalihe onamoon’aka wa yeela. Kinnoonaka ovirikanyiwa. Kinnoonaka okathi kinvekel’aka itthu, ni wunlela itthu, ni oveka itthu, khuvonya ophwanyanya. Masi kamulipelela-ru paahi Muluku n’uvilela, nto koosuwela wira envara muteko oratteene, eniiraneya oratteene, enniira etthu yoolikana oratteene.

⁹¹ Okathi okipweteiy’awe mwan’aka, Sharon mwaamukhaani, miyo...eyo yaari etthu yaakikwattunle. Miyo khwira, “Vanweryaneya sayi okhala ya mureerelo? Vanweryaneya sayi okhala ya mureerelo?” Nto miyeeri ohoolo waya, vamoonyal’aka eemenle-ene iwe mwa ereerelo yothene ya mwali, alavulaka ni miyo, eemenle-ene vakhiviru va evakawu ile yoothononeya, iwe, kaahisuwela wira, vaakhanle wira aahikhala, khino aamutthara ephiro yoohiloka. Muluku aahaana omukuxa ary’ene mukhaani ni oosivela. Koosuwela wira kinoomoona-tho. Koosuwela wira kinoomoona, koosuwela eyo woohikhala hata ohoverya.

⁹² Kinniwuupuwela amwaar’aka a miyaakha miloko miili ni miili, okuxiwa, ary’ene mwaamwali tu, mai mwaamukhaani iwe. Okathi ixornaale saahimaly’aya ihapari suulupale nno, “Mai mwali, reverend... , ohookhwa tu,” oh, moota waakiriipaly’aya murima! Nkaasuwela etthu yo wira.

⁹³ Masi olelo koosuwela wira sothene saavara muteko wa mureerelo aka. Koosuwela wira ekumi yaahaana orowa vathi, ni opittuliwa, ni owammwa, wira ele yaari muhina mwaya ekhumele, ota. Khaareere-mo Branham mmo, aahaana owameliwa ota Muluku ahinatthi wiisuweliha Mmansawe.

⁹⁴ Khyiaareere osarya ya nyuwo mwa nyuwo, mpakha Muluku aarin’awe owamela ota, ovira mowehereriwani. Nto okathi owammwa wiiraney’aya, waari woorika. Masi nuvira okathi vakhani, osulu onoothikela wooneya-wo, vano munimoona etthunelo ya Muluku. Vano munookhuwela, “Miyo koosuwela wira Nvuluxa aka ookhala, nto mahiku ookiserya Owo onoovenya elapo ya vathi! Hata axiitthu ehononaka erutthu ila, nlelo n’erutthu aka kinoomoona Muluku!” Wehereriwa nno vakhani ni itthu ti s’okathi vakhani paahi, nto sinoolakaseya ni

sinoovira. Masi iyo siniireliwa mureerelo anyu, nrowe nuupuwele yeeyo, wira Muluku aphwanye ovuwa.

⁹⁵ Nrowe nurame muru okathi vakhani paahi. Kintthuna kikohe, nihinatthi ovekela, ookhala mutthu va aatthuna wuupuweliwa ni nuulumo na mavekelo nihinatthi omaliha? Muluku ooreeriheni. Akavi mu yaarowa wira, “Kimmuthuna Muluku, okathi wo wehereriwa waka vano, wira akivahe musuwelelo musya, wira kiwerye okhuma-tho musya”? Nvenxe ntata, mwiire, “Kintthuna—kintthuna wira ola okhale ohihimuwa wa miyo, Paasikha, akihihimuxe mwa miroromelo misya ni owerya musya, ekumi esya ni ohakalala musya.” Apwiya yooreeriheni, athu aka oophentiwa.

⁹⁶ Oh, Muluku ahu ni Moopoli ahu, hiyo khaninreere wooxukhuruni Nyuwo mwaha wa Paasikha ola, etthu onihimy’awe wa mirima sahu. Ni mwaha wo waamini, epantt’ile iwe, epante ekina ya muttethe, ninniwerya woona Orwa w’Apwiya, Yesu, ni Awo animwiitthokiha Mmansaya vano, ewaraka ikuwo Saya s’emwene. Ni, Ekereja enoowara, Mutheli onwara ekuwo Awe ya woothelani. Onihalela okhala okumana wuulupale vooihlekela.

⁹⁷ Nikuttha nla n’ettuura khanikhanle okhalaka voohimala. Naawiiwaka athu enitheyeka, eniveehaka, ni eniitthanaka masina oowuliha muru a “masantu oophirikeya,” ni oniveeha, ni wira hiyo hata khanikhanle saana mmuruni, oh, khekhanle okhalaka okathi wothene, Pwiya. Masi munitthuniherye nikhale ntoko Yobi, olipiherya onamoona ahu, munitthuniherye nikhale ntoko Daniyeli mulittini mw’akharamu, wala aana aHeperi muttukutthani mwa mooro, wala Abrahamu mmukwahani mwawe.

⁹⁸ Munikhaliherye, O Pwiya, okhala oororomeleya mpakha noone etthu ile yuulupale okhumelela, “Okathi nlope ninrow’aya oruma, nto ale akhwiye mwa Kristu anrow’aya ohihimuwa; hiyo nikhale akumi ni ninrowa ohala ninootatuxiwa, okathi mmosa, mwa waaphila wa niitho.” Vano nto onimoorwa Paasikha yoole wa hiyo, yoowo Kristu aamuvirihaly’awe miyaakha ekonto emosa ni imiya thanu na xexe khalayi voosiis’ula, ni khwira, “Okhala wira Miyo ka mukumi, nave-tho nyuwo munookhala akumi.”

⁹⁹ “Yesu ene yoola, owelihiwe osulu okhuma eriyari ahu, onoothika siiso ntoko Owo sironw’awe.” Hiyo ninoomoona, hata khula murah mmatatani mw’Awe ni khula exaraha ya mwiiwa mmuruni mw’Awe. Hiyo ninoomoona.

Oh, kinoomusuwela, kinoomusuwela,
Ni koopoliwe-ene kinimweemela mpararini
mw’Awe.

¹⁰⁰ Ayo, Pwiya, murim’aka woohaawa, okathi erutthu aka ela yootteethya empacery’aya wuuramela vathi va muritti,

soovela-vela ni miteko sa mmapuwani m'ohepha, mmapuwani mwa miteko, ni sooreera ni soonanara, ni ohicaliwa w'arumeyi oowiiisoona, ni sikina, vapuwani, ni atthu ethanyaka, ni ikuru sootakhala. Masi, O Pwiya, nihiku nlo hiyo nnimoorwa ntoko Eliya, ohitto omurathini; niwehe iwe, yoolutteleliwa khula mwiri, ekaaro ya mooro enrowa onikuxa ni onikumiha mu. Munihiye nisuwele wira makuttha ala a ettuura ittiyelelo paahi sinniipitiherya etthu ile yuulupale eri ohoolo tu, ovuwa iwe wuulupale.

¹⁰¹ Wira nikhale oororomeleya ntoko Yobi, mpakha niwerye omoona Yoowo, ethoni n'ithoni. Nikhale oororomeleya ntoko Pwiya'ahu saary'awe, ntoko nthoonyeryo ahu, orowa oKalvario o. . .oolikana wira nikhomeliwe vamwiikimanyo, ni okhomeliwa vamwiikimanyo ni Yoowo, wira okhale ohihimuwa mw'ekumini mwahu. Munivahe, Pwiya.

¹⁰² Wira, yaakhanle-ene anamanyemula va, yaari ntoko Paulo a khalayi, yaanyemulasa, awo emphwanye Paasikha erowaka owaani voosiis'ula. Munivahe, Pwiya.

¹⁰³ Ninnivekela, Pwiya, wira ale ari vanikutthani n'ettuura ya opwetexiwa, ntoko nikuttha n'ettuura ya eretta, wira ola okhale p'ukathi anrow'aya ovuluxiwa.

¹⁰⁴ Nsana ohiyu, kilavulaka ni mwamuthiyan'ole vatrelani, ni iy'awe; moota ele oPhoenix iwe, mwa mukhalelo mmosa wootepa, ni akankuru ale aalupale ery'ene vale mwa yaawo, nto vano olelo ori mukumi ni oolikana. Ni ttutthu mwaamukhaani aarowa okumihwa murima, okilanthé wa mpaani mu voosiis'ula, oolikana, mukumi. Mwammiravo mmosa oohoona aatonko weetta mw'epiphini ni ahaatonko woona okokola, onneetta olelo ni onnoona okokola. Nto, O Muluku, moota onooxukhuru-ahuni Nyuwo mwaha wa yeela! Nto ela yothene oweha epantte ekina y'ekuwo, nihiku nle nuulupale no ohihimuwa. Munivahe, Tithi. Nto mwaahiye esuwele wira itthu iya saahaana okhala siiso, wira iya: mwammirav'ola ahoona awerye woona, wira mwanamwane aarina eretta ya murima aavahe onamoona akina. Itthu iya sothene sineettiheriwa vamosa wa mureerele w'ale anoophentani Nyuwo.

¹⁰⁵ Sothene sookhalihwa sooweryaneya wa hiyo okhala wira aahikhala Mmosa aiwelenle mowehereriwani, aahikhala Mmosa Yoowo aavilenle wehereriwa, aari Yesu. Mmosa Yoole aari oowiiwelela saana Atithi, mpakha Atithi omuhimuxa voosiisu wa Paasikha, okhala wira khivaaweryaneya Owo okhala oovareleliwa mookhwaani. "Maana Miyo nkinimuhiya Oowaarya Aka wuntta, nnakhala munep'Awe nkinihya mookhwaani." Tthiri, Owo aaphwanyiwa oororomeleya, okathi wothene avaraka ele yaasivela Atithi.

¹⁰⁶ Muluku, hiyo nikhale oororomeleya mahiku othene voopuroni va muteko. Hata wira wehereriwa wahu ori sayi

ni mikattyamiho sahu, sothene, nikhale oowerya ohimya, okathi wothenene, “Miyo koosuwela wira sothene sineettiheriwa wa mureerelo w’ale animphenta Muluku.” Munivahe, Tithi.

¹⁰⁷ Hiyo ninnaareeraha atthu ala voosiis’ula ni iparakhha Sanyu. Awo arwiye oxaaka okhuma mmawannyaya, awo ahoorwa otapernakulu. Awo arwenle ophwanya ohakalalihiwa. Erowe owaani voosiis’ula, ni Owerya wa Eroho Yowarya ovihaka mmurimani mwaya, yeettaka mphironi ntoko ale yaakhuma Emawusi, yiiraka, “Mirima sahu khisaaniviha, okathi Owo aalavul’awe ni hiyo mphironi?” Munivahe, Tithi. Kinnaavahererya wa Nyuwo vano, mwa Nsina na Pwiya Yesu Kristu. Amen.

Vaareera, Munna Neville. Nto vano muupuwele okokhorela.

¹⁰⁸ Khanirina ittikitti sa mavekelo voosiis’ula, okhala wira, nakhalana-ru ittikitti sa mavekelo, kaakhaliharu atthu awo yeemenle-ene va siiso, nlelo kinoolipana yoovaha eyo. Kihaana okhalana nipuro mpakha kinihiy’aka eyo epantte ekina, vaavo kikhanly’aka weettaka va ni kikhanly’aka. . . Kinnoova. Kinkhala ntoko kirootuthuwa, ni kinnoova ovonya. Oxinttiwa ewanelo, kuhiyo oxinttiwa ekhotto. Patton aahixinttiwa iwanelo soowaatta, masi owo khonaxinttiweke ekhotto. Ti yeeyo. Nto hiyo ninooxinttiwa iwanelo soowaatta, nave, masi khaninxinttiwa ekhotto. Kinoovonya vanci-ene, masi nkinrowa oxinttiwa Niwoko nene. Muluku ookivaha, ni Muluku onookhapelela. Owo—owo muttikithelo. Nto vano ola okathi, kookupali wira okathi woophiya, nto kinoopacerya, okhalaka wira nla nihiku na Paasikha, kinrowa orowa—okelela ohoolo ntoko siiraly’aka iwe kaavekelelaka aretta. Nto kawerya vale. . . Owo muttikithelo. Eyo etthu erina wiiraneya ni miyo. Nkihiyo oolimalelaxa yoowo. Owo onoorwa mwa enamuna emosa, khino kihinwery’aka ophwanya oratteene, masi kihaana okhala kirowaka ni yoowo mpakha osuwela khula okathi. Vano nla ninrowa okhala nihiku kinrow’aka wehererya, ni mahala a Muluku.

¹⁰⁹ Apwiya yooreeriheni vano. Munna Neville. Nto okokhorela onrowa opacerya iwoora mithanu na mixexe ni minuutu miloko miraru. Munna Neville.



MIYO KOOSUWELA EMK60-0417s
(I Know)

ETTHERANELO YA MUTTHAKA WA PAASIKHA

Mutthak'ola wa Munna William Marrion Branham, opaceryawene olaleeriwe ni Enkelesi voosiisu w'Ettiminku ya Paasikha nsuwa nikhumakaru, mahiku yeettaka 17 mweeri wa Abril, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org